

QUÆSTIO MEDICA,
QUODLIBETARIIS DISPUTATIONIBUS
MANE DISCUTIENDA
IN SCHOLIS MEDICORUM,

Die Jovis 8 Aprilis 1717.

M. JOANNE DAVAL,
DOCTORE MEDICO,
PRÆSIDE.

An Testes ad Mentis fecunditatem multum conferunt?

Nè dicatur immundum, quod creavit Altissimus. Omnia
munda mundis. Procul hinc obscœnitas.

I.

HUMANA mens divinâ fecundatur. Hujus fetus, cogitationes:
quæ variæ. Aliæ citra corporis commercium sunt: aliæ ejus mi-
nisterio. Illæ circa Deum, ipsamque mentem: hæ circa sensuum ob-
jecta versantur. Ex multis, per vices gignuntur. Ex quibusdam, om-
nes in mente sunt ab ejus creationis exordio: non tamen instar ovo-
rum in ovario. Molem non habent. Locum non occupant. Nonnullis
verò videntur mentis modificationes; sed secus ac animalium fetus:
qui è portiunculis corporis parentum modificatis constant; ne igitur
quid simile in cogitationibus putes. Apage eorum sententiam, quæ
illas in certâ tenuis materiæ modificatione constituit. Materia, vel te-
nuissima, quâvis ratione modificata dimensione non caret. Extensio;
ejus essentia: sine qua nec esse, nec concipi potest: at in cogitatione

A

nil extensum. Mens tamen & ipsius cogitationes à materiâ in multis pendent. Hæc Dei nobilis imago in primis parentibus eleganti fecunditate ante fatale delictum donabatur. Ab hac transgressione aut ferè sterilis est; aut sæpè cum labore parturit; frequenterque luit sui corporis vitia. In cerebro sedet. Quæ ejus in parte? non in posteriore, quæ solis vitæ functionibus inservit, sed in anteriore, hujusque medullari substantiâ. In hac è sapientiorum sensu diversi insunt characteres, quos vocant ideas corporeas suscitandis incorporeis inservientes; & quos internas litteras in hanc operam exartatas, ac singularem viventemque librum efficientes non minùs bene nuncupabis. Nil in eo nisi à divino Typographo scriptum, sive proximè, sive spirituum objectis modificatorum interventu. Qui illos characteres à supremo Artifice proximè impressos repetunt: censent Adamum in primâ origine horum penè infinitorum, bellèque apertorum auxilio rerum omnium scientiâ præditum, orbemque universum in ejus cerebro pictum fuisse. Adeò ut hoc mentis domicilium mundi compendium dici potuisset. Post verò primum delictum ejusmodi typis non parùm depreßis Adamum cum ipsius posteritate summæ rerum ignorationi esse traditum non sine veri specie stabiliunt. Inde ad rerum notitiam labor. Inde & actionis objectorum, & voluntatis de ipsis cogitandi, pluries repetitarum necessitas. Illi characteres non æquales in omnibus. In aliis strictiores sunt; in aliis patentiores. In amplo cerebro ritè conformato ampliores, in exiguo arctiores esse debent: ut uberrima foramina arte facta, in majori papyro magis aperta, in minori maximè compressa, angustissima. Multi spiritus insignes cerebri typos, pauci, exiles subeunt. Ab illis claræ, ab his obscuræ notiones. Non mirum, si cerebrum in fato functis præstantis ingenii viris amplissimum observetur: angustum in fatuis. Si mali ominis sit acuminatum caput. Si aves, pisces, mures, multaque alia animalia; quibus vulgò phantasia, principesque functiones denegantur; medullari callosâque substantiâ aut careant, aut hujus moles in ipsis sit tenuis admodum, sæpèque vix conspicua. Verùm ejus in homine characteres, quamvis bene dispositi, parùm utiles ad mentis operationes, illiusque fecunditatem. Nisi copiosis spiritibus gaudeant.

II.

CEREBRUM sine spiritibus verè sese habet instar machinæ, vel hydraulicæ sine aquâ, vel pneumaticæ sine aëre. Sine his inutilis prorsus utriusque concinna coagmentatio. Si verò aqua & aër non deficiant, quid jucundius? quid admiratione dignius? videas aquam è propriâ, quam lustravit, machinâ egredientem: & mirare artificiosos ejus vel saltus, vel decursus, & omnigenas determinaciones, ac modificationes innumeras à variis mutuatas suæ machinæ typis, quos solers inculpfit Artifex. Attendas quoque ad aërem pneumatico instrumento variè modificatum. Quibus indè sonorum gra-

tiis, quâ harmoniâ non delectaberis? quanta insuper utilitas ex illis machinis proprio, sibi que convenienti liquido refertis expectanda! varii generis molestinâ, variaque hausta, ad vitâ tûm commoditates, tûm conservationem adeo necessaria, id tibi comprobent. Ex his intelligas solam cerebri dispositionem, mirandam licet, suscitandis animi, ut corporis, actionibus, cogitationibus, fecunditati non sufficere. Quos Dei digitus in mentis operationum gratiam characteres impressit. Hi sine spiritibus dubio procul inutiles. Horum numerus, amplitudo, diversâque figurâ copiosos requirunt. Ut mens ipsorum interventu suos fetus edat. Cerebrum equidem divinâ elaboratum arte elegans est mentis domicilium: sed quid Palatinum pulchrioribus licet sculpturâ picturâque ornamentis decoratum sine lumine? quid terra in mediis tenebris, floribus, innumerisque aliis rebus divinitus pictis ornata? quid cælum ipsum, orbis decus, præcipua Numinis sedes; si stupendo prodigio fieret omnium astrorum eclipsis? quid ergo microcosmi cælum absque spiritibus, lumini adeo analogis? ejus tunc cœlestis incola veluti cæca, iners, ferèque sterilis jacet. Sed iis lucentibus, quàm fecunda! uberrimorum spirituum necessitatem ad copiosos frequentesque mentis partus contrariorum legibus iterum noscas. Dicit tibi experientia, eos esse hebetes, & indecorâ sterilitate affectos; quibus crassior & vapescent sanguis, à quo paucissimi evanidique spiritus. Sic nec in infantibus, nec in senibus mens plerumque viget. Sic obstructis spirituum in cerebrum viis, glandulis præsertim corticalibus, solers prius & sagax ingenium paucas etiam ac imbecillas cogitationes (raram mancâque prolem) progignit. Quantum videlicet illud mutatum in soporosis, variisque aliis affectibus vides! immò post ipsos sæpè ejus imaginatio, communium rerum memoria, & plerâque perceptiones languent, depravantur, nec-non interdum abolentur. Ad mentis igitur fecunditatem spirituum ubertas cum rectâ cerebri dispositione requiratur.

III.

NE tamen censeas spiritus esse mentis fecunditatis authores. Effectus quilibet suæ causæ naturam sequitur. Incorporea à corporis non procedunt. Ens creatum è nihilo aliquid efficere nusquam potest. In spiritibus, ut potè corporeis, nihil inest incorporeum. Nullæ ideo incorporeæ actiones, nulli mentis fetus ex illis tanquam ex efficiente causâ manare possunt: ut ex mente nulli spirituum, vel aliorum corporum motus, eorumque nulla genesis, propter similia rationum momenta. Hinc nec temerè proferes, eos a vero prorsus deflectere; qui ab animâ, ut à causâ, corporis functiones repetunt. Porro anima, cui noscere datum est, corporis mechanicen, ipsosque spiritus, aliosve liquotes ad illas efficiendas necessarios, seque tunc agere, adverteret. Quid magis experientiæ contrarium? plura dicam: ipsâ volente, omnes corporis operationes optimè peragerentur: nolente cessarent. Vita & mors sub ejus tenerentur imperio. Quot homines in prosperitate,

sanitatis & vitæ amantissimi, cupitâ immortalitatem sibi largirentur: si per Deum liceret? quot è contrâ in fortunæ reflatu suas miseriaſ letho finirent. Pauci haud dubiè hac præjudicatâ opinione obcecantur. Sed multi dicent ipsâ experienciâ teste, animam saltem esse certorum motuum causam: & vice versâ certos corporis motus quarundam animæ actionum ac cogitationum effectores. Sed quàm falluntur, pro causâ occasionem sumentes! dent manus superiùs allatis argumentis: & aliam, eamque genuinam ac efficientem, illorum effectuum causam inquirent. Nullam præter Deum, rerum omnium parentem, invenient. Hæc meritò fuit enti creato negata potestas. Illud ex se nihil habet: & strictè loquendo nulli ex eo effectus, etiam ipsius naturæ similes, tanquàm è verâ causâ prodeunt. Ex his & supra dictis liquet; quàm solidè divinum decretum stabilitum sit: & quanto jure augustum animi & corporis vinculum censerî debeat. Sic supremi Conditoris voluntate spiritus, non ut causa efficiens, sed ut occasio, cogitationes in mente suscitant. Si copiosi: quot sunt illæ! quàm fecunda mens! quanta inde eorum, à quibus potens spirituum genesis, necessitas! ad illam plures certè partes, sed ex his testes maximè conferunt.

IV.

NULLA ferè corporis pars, quæ procreandis spiritibus non inserviat. Ventriculus fermento suo à solivâ forsan non discrepante, suarumque fibrarum motu, eos ex alimentorum gremio, in quo à naturâ delirescunt, primò evolvit. Horum enim genesis, simplex est ipsorum ex aliis particulis solutio. Huic quoque pulmones non mediocriter favent. Sanguis in horum venâ (secùs ac in arteriâ) tenuis, & floribus admixti aëris auxilio, ut alterno repetitoque eorum motu, spirituum generationis validissimum est indicium. Cor suis solidissimis, & maximè oscillantibus fibris, nec-non arteriæ omnes iisdem moribus, suisque passim labyrinthis anfractibus, ut chymicorum serpentinum in eliciendo defecandoque spiritu vini, idem opus moliantur. Lien ipse, à multis licet despectus, spirituum procreationem juvat acido fermento suis vesiculis contento, & fortassis vividior factò vividissimi liquoris è nervo in iis disperso stillantis admixtione. Partes profectò innumeræ edendis spiritibus dicatæ sunt. Sed ex his præter cerebrum, cui multùm tribuitur, nulla testiculis potentior. Hujus rei firmissimum argumentum, seminalis aura à spiritibus non discrepans; in amore oculorum splendor, pulsus micans, exquisiti sensus, rubor & fulgor faciei, lætitia, miraue cogitandi & loquendi facilitas. Hæc & similia (quæ uberrimorum spirituum effectus) deficientibus testiculis non contingunt. Ab illis igitur spiritus magnâ ex parte gignuntur. Nec solâ rei venereæ cogitatione recensita phænomena citrà testium præsentiam produci solent. Istarum partium dispositio ad eliciendos spiritus apprimè conducens tibi non incassum innotescet. Illæ microscopii auxilio oculis exhibent congeriem infiniti-

torum penè villorum, qui in muribus, aliisque nonnullis animalibus sine vitro optico manifestè cernuntur; & qui ita robusti sunt; ut à se invicem facilè separari, iterumque in glomeres convolvi possint. Seminales particulae per innumeras hasce convolutiones permeare nequeunt sine repetitâ collisione; quâ earum multæ è crassioribus copiosius extricantur, jam præperantium, vicinarumque, arteriarum icibus non parùm evectæ. Subindè è testiculis in epididymidum pleixibus simili collisione rursùs acuuntur, mox in seminales vesiculas, & ex his in proximas venulas ubertim, licet partim, transiturae; nec non è sanguine similes expedituræ particulas, ut vividi liquores arte chymicâ proliciti, qui superstiti materiae pluries affunduntur, ad similitudinem particularum solutionem evectionemque juvandam. Subtiles illi seminis spiritus in corpus refluï mentis fecunditatis ministri sunt: cùm per circuitûs vias ad cerebrum translati ipsùm copiosè profundèquè subeunt, cinereo ac glanduloso cortice ex aliis particulis priùs secreti. Huic operæ multùm inservit conclusus nobilissimè ejusce visceris sinubus sanguis. Qui instar balnei Mariæ vicinos purpurei laticis rivulos (prægnantes spirituum matrices partui proximas) rarefacit; & cerebri glandulas, tubulosque blandè reserat, faciliiori ac uberiori spirituum secretioni locum daturus. Hic tamen sanguis, quàm insensus, si aut uberior, aut crassior! quàm sæpè tunc est soporis fatalisque apoplexiæ pertimescendus effector! ut potè potentior actione fibrarum, quæ ab uno latere sinuum in alterum transversim lata sanguinem in salubri statu minùs obstitentem suâ contractione solent in hiantes venulas pellere. Multa in sano cerebro, ut dura meninx insignibus suis oscillationibus, & carotides arteriæ suis innumeris anfractibus, ad edendos secernendosque spiritus maximè conferunt. Sed horum vires sine testiculorum auxilio plurimùm infirmantur. In istis procreationis partibus vividum inest fermentum, quo cætera partim, multùm tamen, vigent: quoniam ab illo, ut ab ipsorum testium dispositione validissima spirituum genesis. Rides de fermento. Hoc cum multis explodis; sed perperam explodis. Microcosmus eadem ac mactocosmus, cujus est compendium, complecti debet. In illo haud dubiè multa sunt fermenta, multa scilicet mole minimâ, quibus maxima potestas. Scintilla flammam immò incendia suscitât. Opii granum unicum sudores movet. Immanes dolores sæpè compescit. Pauca thuris, aliorumque odoratorum grana (in ignem præsertim injecta) multa spatia replent; multorum odoratum percellunt. Hisque benè olentibus eorum mens & vires recreantur: è contrâ in hystericeis, sæpè enormes convulsivique motus, nec non interdùm horrida quies, & quasi mortis imago, veræ convulsionis soboles, inducuntur. Sed illas brevi levissimus fœtidarum rerum fumus suscitât. Quanta in minimis potentia! efficaciores humani corporis particule sub parvâ etiam mole vires supradictis megalocosmi productis non impares nanciscuntur. Maximè si ex aliis inertioribus secreta sibi invicem contingant; earumque vis unita fortior evadat. Quid non possunt ali-

quot seminis guttæ in utroque sexu æstuentes! quot & quanti earum effectus in corporis generatione? quanta tûm in sēminis mutatio! quid quoque non potest supra recensitis lienis succus? præter spiritus aliasque tenues particulas, egregiè bilem ex implicantibus sanguinis partibus expedit, jecoris glandulis faciliè trahiciendam. Id tibi constabit si sanguinem venæ portæ à liene proximè & maximâ ex parte redeuntem gustaveris: ejus enim saporem tunc percipies amarum, (certum extricatæ bilis signum) qui sapor in aliis venis alius tibi videbitur, etiam in venâ splenicâ: quod ex eâ priùs effluerit sanguis; quàm ex ipsius crassioribus partibus bilis fuerit expedita: quamvis lienis fermentum in hujus venâ agere jam caperit. Ejusce fermenti, & forsan aliorum aliundè manantium præsidio factâ bilis evolutione, deinceps sefectione, corporis functiones commodiùs esse peragendas pauci haud dubiè inficias ibunt. De fermentorum tamen in homine atque animalibus existentia anceps adhuc, & dubius hæres. Ad fortem testiculorum odorem fortemque saporem, præsertim in Hircis & Castoribus, variisque aliis animantibus, tantisper attendas: & maxima eorum energia, fermentique vis tibi demonstrabitur, quotidiano insuper usu comprobata. Quem enim latet paucagrana Castorei (mortui licet bestię) mulieres hystericas ferè exanimes ad vitam subito veluti revocare. Semen, iterum dicam, tollat omne de fermentis dubium. E corruptâ ejus vel minimâ portione, præsertim in mulieribus, quàm horrenda emergunt symptomata! quot strages! si verò illud omni ex parte integrum: quis inde vigor! quæ sanitas! quid meliùs actuosissimi fermenti naturam demonstrat? fermentorum existentiam, etiamnum diversitatem ob varias particularum connexiones variosque poros atque interstitia utilissimam, diversus glandularum sapor non parùm etiam stabilis. Hoc evincitur, in iis succos inesse fetos salibus aut diversis aut diversè mixtis: qui certè non evanidi, sed variis viribus pol- lentes; à quibus varii effervescentiæ fermentationisque effectus repetendi. Hos inter non ultimum locum occupat copiosa spirituum generis actuosus testium fermento facta, & futura potens mentis fecunditatis occasio.

V.

TESTICULORUM vim ad spirituum procreationem, mentisque ideò fecunditatem, Eunuchi pristinæ suæ integritatis memores nimis agnoscunt. Istis dùm fruebantur partibus; quantis ipsis erat mentis corporisque vigor! nunc mæsti, timidi, ad quasvis operationes pigri, variisque lacessiti ægritudinibus testium potestatem prædicant. Forsan hæc deficientium in Eunuchis spirituum signa tibi dubianti non sufficiunt. Plurima, quæ simul juncta clarioribus haud sunt demonstrationibus imparia, inferiùs videas, expendas. Tuum mereantur assensum extincti in illis concupiscentiæ ignes, vox degener, imbellis, barba non ampliùs luxurians, immò ferè deficiens, languidus pulsus, tumidumque corpus, & maxima in somnum propensio non ab

effervescente sanguine, sed ab hujus crassitie & segnitie (inopia spirituum effectu) repetenda. Quæ in hisce mutilatis mutatio! ipsos nec superbia inflat; nec inflammat ira; nec vindicta movet; nec delectat ambitio; nec voluptas abripit. Hæc omnia maximam spirituum paupertatem plerumque evidentiter arguunt; aut saltem interdum innuunt eos esse sub crassiorum particularum pondere ita depressos; ut certo sensu inopes etiam dici possint, & deficientium instar ad mentis fecunditatem nullatenus idonei. Si tanta in Eunuchis spirituum inopia! quanta illorum ubertas in iis, quibus testes servati sunt! id contrarium lex utique demonstrat. Illis orbatu sapienter sanè nunc, ut olim, excluduntur à sacerdotio, in quo mentis robur (perpetuus abundantium spirituum comes) tum ad explananda, cum ad tuenda supremi Numinis oracula requiritur. Graviter delinquant, qui curandarum herniarum gratiâ, aliisve de causis gemina hæc generationis organa præposterè eximunt, vel atterunt, vel frangunt: ut qui vitiis turpitudine, veneris præsertim contagio sibi accersunt affectus, solâ istorum virilium sectione ac sublatione sanandos. Utrique non modò corporibus, sed etiam ingeniis, artibus proinde & scientiis, infensi, pernitiosi, divinis humanisque legibus coercendi. Quàm igitur utiliter ejusmodi partes, validissimæ spirituum procreatrices, mentis fecunditati inserviunt! quò enim copiosiores erunt spiritus; eò plures cerebri characteres referare, lustrare, ab hisque modificationes & typos distinctius recipere poterunt; & ipsis propterea uberiores ac fortiores ideas, atque cogitationes suscitare dabitur. Hi mentis fetus tot sunt aliquandò, tamque micant: ut novæ ac innumeræ veluti Minervæ ex humanâ mente nasci videantur. Mirare veri Jovis agendi rationem, sanctasque leges in fecundandâ ipsius imagine: & quantam in tantum opus testibus vim tribuerit.

Ergò testes ad mentis fecunditatem multum conferunt.

Domini Doctores disputaturi.

M. Petrus Afforty.	M. Jacobus Fournneau.	M. Nicolaus Andry, Lector Regius & Regia Scientiarum Academia Socius.
M. Antonius Claudius Renard.	M. Michael-Ludovicus Reneaume de la Garanne, Regia Scientiarum Academia Socius.	M. Claudius Dufresne,
M. Franciscus Bailly.	M. Raymundus-Jacobus Finot.	M. Philippus Hecquet, ant. Facultatis Decanus.

Proponebat Parisiis JOANNES-FRANC. LEAULTE'
Parisiinus, Baccal. Medicus, A. R. S. H. 1717. à 6^a ad merid.

Typis JACOBI QUILLAU, Universitatis & Facultatis Medicinæ
Typographi.